

PENDAHULUAN

Alhamdulillah, segala puji bagi Allah, tuhan sekalian alam, yang telah mengizinkan kami untuk berkongsi idea, menulis dan menyiapkan kerja kursus bagi menyelidiki *hukum penggunaan jampi dan mantera dalam perubatan Islam*. Terima kasih kami ucapkan kepada pensyarah kami, Ustaz Wan Haslan Khairuddin yang telah memberikan bimbingan dan tunjuk ajar disepanjang proses kami menyempurnakan tugas ini. Tidak dilupakan juga kepada para sahabat yang membantu secara langsung mahupun tidak langsung, semoga jasa kalian mendapat ganjaran di sisi Allah SWT.

Ilmu pengubatan Islam adalah salah satu daripada cabang-cabang ilmu Islam. Bahkan al-Quran selaku sumber perundangan Islam, al-Quran juga mengandungi syifa' iaitu kesembuhan bagi orang-orang yang menghayati dan meyakini. Firman Allah SWT dalam al-Quran, surah al-Isra' ayat 82 yang bermaksud:

“ Dan kami turunkan daripada al-Quran yang menjadi penawar dan rahmat bagi orang yang beriman”

Ilmu pengubatan Islam tidak terlepas daripada menerima pelbagai dakwaan dan tohmahan yang dikatakan bukan datang daripada syariat Rasulullah SAW dan pelbagai pertikaian yang dikemukakan daripada mereka yang tidak berpuas hati. Dalam tugas ini, kami akan merungkai dan menyelidiki bagaimana jampi serapah dan mantera yang diamalkan oleh ahli perubatan Islam di Malaysia ini berlandaskan syarak ataupun tidak? Apakah garis panduan dalam penjampian? Adakah jampian selain ayat al Quran dan Hadith diterima Islam? Bagaimanakah jampi yang sahih dari Rasulullah? Semoga dengan penulisan ini dapat merungkai masalah tersebut. Wallahu ta'ala a'lam.

TOPIK 1: DEFINISI PERUBATAN ISLAM

Tidak ada definisi khusus mengikut sejarah tentang sistem perubatan Islam. Ia merangkumi ilmu sains yang dibangunkan di dunia Islam pada Zaman Keemasan Islam (*the Islamic Golden Age*) diantara tahun 750 hingga 1258 masihi. Pada masa itu ilmu dari India, Iran (Persia) dan terutamanya dari Greek telah diterjemahkan ke bahasa Arab. Terjemahan buku-buku inilah yang menjadi sumber ilmu sains bersama dengan ajaran Islam yang syumul membangkitkan ramai para ilmuan yang bukan sahaja pakar dalam bidang sains malah berilmu dalam bidang ugiama itu sendiri. Para ilmuan ini berasal dari berbagai bangsa termasuk Arab, Parsi, Turki, Berber dan Moor. Walaupun kebanyakan dari mereka berugama Islam tetapi ada juga sebahagian daripada mereka adalah Yahudi dan Nasrani. Bidang ilmu yang diceburi mereka termasuklah Perubatan, Matematik, Astronomi, Fizik, Kimia, Kosmologi, Oftalmologi, Geografi, Sosiologi dan Psikologi. Pada masa ini sains dianggap holistik dan berkait rapat dengan falsafah Islam. Mereka dianggap sebagai Hakim dan Ulama.¹

Pada zaman kegemilangan ini, sistem perubatan tidak bercanggah dengan prinsip Islam, baik dari segi falsafah teori nya mahu pun dari segi etika pengamalan nya dengan menggunakan bahan-bahan yang halal dan mengikut sunnah Rasulullah termasuk juga merujuk kepada kitab suci al-Quran². Oleh itu ada juga para pengamal perubatan Islam melabelkan sistem perubatan Islam sebagai amalan perubatan menggunakan bahan-bahan halal termasuk amalan yang digunakan oleh Rasulullah seperti yang tercatat di dalam Tibb an-Nabawi. Berbeza dengan tamadun barat yang mengasingkan ugiama dengan ilmu sains serta amalan harian lain, tetapi Islam sebagai '*ad-din*' tidak mengasingkan ugiama dengan ilmu sains dan perubatan.

Oleh itu takrifan sistem perubatan Islam ialah semua amalan perubatan yang memberi manfaat yang tidak bercanggah dengan prinsip Islam dan tidak menggunakan bahan-bahan yang diharamkan oleh Islam. Ini termasuklah amalan

¹ Kamaruzzaman Wan Su, 2011, *Kronologi Sistem Perubatan Islam*, Universiti Islam Antarabangsa Malaysia, Pahang. Hlm. 1.

perubatan alopati moden, perubatan homeopati, ayurveda dan lain-lain perubatan tradisional.

Kasule mendefinisikan perubatan Islam sebagai berikut: *‘Islamic Medicine is defined as Medicine whose basic paradigms, concepts, values and procedures conform to or do not contradict to the Qur’an and Sunnat. It is not specific medical procedures or therapeutic agents used at a particular place or particular time. Islamic Medicine is universal, all-embracing, flexible and allows for growth and development of various methods of investigating and treating diseases within the frame-work described above’.*

Seterus nya Kasule menerangkan yang perubatan Islam itu sama seperti agama Islam itu sendiri iaitu konsep universal yang merangkumi semua system perubatan sekiranya ia menepati kriteria Islam. Konsep perubatan Islam tidak hanya terhad kepada amalan perubatan Rasulullah, *tibb nabawi*, atau amalan perubatan tradisional Yunani.²

TOPIK 2: PANDANGAN TENTANG PERUBATAN ISLAM

Allah berfirman dalam surah *al-Isra’* ayat ke 82 yang bermaksud:

“Dan Kami turunkan di atas (isi) al-Quran, sesuatu yang boleh menyembuhkan dan rahmat untuk orang-orang beriman”

Allah juga berfirman dalam surah *Fussilat* ayat ke 44 yang bermaksud:

“Katakanlah bagi mereka yang beriman, al-Quran itu adalah petunjuk dan penawar bagi mereka yang beriman. Mereka yang tidak beriman, pada telinga mereka ada sumbatan, sedangkan al-Quran itu sesuatu kegelapan bagi mereka. Mereka ini adalah seperti orang yang dipanggil dari tempat yang jauh.”

² Kamaruzzaman Wan Su, 2011, *Kronologi Sistem Perubatan Islam*, Universiti Islam Antarabangsa Malaysia, Pahang. Hlm. 2.

Namun persoalannya, adakah perubatan Islam ini mampu mengubati penyakit-penyakit jasmani? Adakah perkataan ‘penawar’ di atas merujuk kepada penyakit-penyakit kronik atau hanya merawat penyakit-penyakit hati, rohani ataupun batiniyyah sahaja?

Persoalan ini dapat dirungkai apabila kita memahami maksud perubatan Islam itu sendiri. Perubatan Islam adalah semua jenis perubatan dan teknik rawatan yang tidak bercanggah dengan syariat Islam samada dengan kaedah elopati , hameopati, ayurveda dan lain-lain perubatan tradisional. Walaubagaimanapun, secara khususnya, perubatan Islam adalah satu usaha dalam merawat penyakit yang berasaskan wahyu Ilahi yang diambil dari petunjuk Al-Quran dan As-Sunnah, yang juga dikenali sebagai perubatan Nabi Muhammad SAW.

Dalam sebuah hadith, Rasulullah menyebutkan bahawa: *“Al-Fatihah itu adalah penawar semua penyakit kecuali maut”* (Riwayat Ibn Rahuwiyah daripada Ali r.a).

Maksud hadith ini lebih jelas menunjukkan penawar kepada penyakit yang dimaksudkan oleh Rasulullah adalah segala bentuk penyakit samada jasadiyyah ataupun batiniyyah kerana maut itu sendiri adalah penyakit zahir yang dialami oleh jasad seseorang.

Malah terdapat banyak riwayat dan ruqyah-ruqyah perubatan yang telah diamalkan oleh umat Islam dan turut dibuktikan kesahihannya, khusus bagi merawat pelbagai penyakit-penyakit jasad ini. Bukan hanya tertumpu ke arah bagaimana merawat penyakit hati, malah penyakit-penyakit kronik seperti angina ahmar, barah, sakit jantung, kencing manis dan sebagainya turut tersenarai dalam penulisan-penulisan perubatan cara Islam yang telah direkodkan pada hari ini.

Apabila sesuatu penyakit tidak dapat disembuhkan dengan cara moden, pesakit akan cuba mencari jalan lain untuk mengatasi masalah yang sedang dihadapi. Oleh itu peluang perlu disediakan agar pesakit-pesakit itu tidak putus asa dalam usaha mencari kesembuhan. Hal ini tidaklah bermaksud untuk mengambil alih tugas hospital dan klinik melainkan hanyalah bagi mencari ikhtiar dan berusaha dengan

cara yang lain. Namun harus diingat, ibu kepada segala bentuk perubatan ini adalah keimanan, keyakinan, dan kepercayaan yang tinggi kepada Allah sebagai penyembuh segala penyakit, serta menjauhkan diri dari segala perkara yang boleh membawa kepada kesyirikan.

Jika kita renungkan kembali, samada menggunakan kaedah perubatan yang berbeza, seseorang tidak dapat lari dari hakikat bahawa Allah jualah yang menciptakan manusia dan mengetahui unsur-unsur yang sesuai kepada jasad makhlukNya samada berbentuk zahir atau ghaib. Dia jualah yang memberi penyakit dan ubatnya. Dia jualah yang menciptakan segala isi bumi ini untuk digunakan di dalam bidang perubatan pada hari ini, walau apapun nama di beri, segala sumbernya datang dari Allah.

Jadi mengapa perlu dipertikai adakah perubatan itu datangnya dari Allah ataupun manusia kerana ilmu perubatan itu sendiri adalah milikNya yang dipinjamkan kepada manusia. Namun Allah memberikan pilihan dan jalan yang banyak kepada kita untuk memilih mana-mana jenis perubatan yang mampu merawat penyakit berlandaskan etika perubatan Islam yang betul. Alangkah indahnya jika setiap perubatan moden hari ini diselitkan juga dengan ayat-ayat al-Quran dan ruqyah-ruqyah untuk diamalkan oleh pesakit agar masing-masing menyedari bahawa kepada Allah kita datang dan kepada Allah jualah kita kembali.

TOPIK 3: DEFINISI MANTERA, JAMPI & SERAPAH.

Mentera diambil daripada perkataan sanskrit "mantra" atau "manir" yang merujuk kepada kata-kata dalam kitab suci penganut Hindu, Veda. Dalam masyarakat Melayu, mentera atau juga dikenali sebagai jampi, serapah, atau seru merupakan sejenis pengucapan yang berentak puisi yang mengandungi unsur sihir dan bertujuan bagi mempengaruhi atau mengawal sesuatu perkara untuk memenuhi keinginan penuturnya. Antara lain, mentera merupakan ayat yang dibaca bagi melakukan sihir, iaitu melakukan sesuatu secara kebatinan, seperti menundukkan musuh, melemahkan musuh, atau memikat wanita.³

³ <http://alam-melayu.blogspot.com/2007/06/definasi-mentera-jampi-serapah.html>, 5 Februari 2014.

Selain itu mentera dianggap mempunyai kuasa ghaib yang luar-biasa yang membolehkan pembacanya mengawal seseorang atau alam semulajadi. Antara ciri-ciri mentera adalah ia berbentuk puisi, isi dan konsepnya melambangkan kepercayaan masyarakat masa itu, dicipta bagi satu tujuan tertentu. Secara kebiasaannya, ia bersifat sihir simpati, iaitu sesuatu sifat disebut atau dikaitkan agar pembaca mentera tersebut dapat memiliki sifat yang sama. Sebagai contoh bacaan mentera, "*..Aku bukan tepuk bantal, tetapi tepuk hatimu..*" dan yang lain-lain yang seumpama dengannya.⁴

Ciri-ciri umum sesuatu mentera biasanya adalah:

1. Ia terdiri daripada beberapa rangka yan berirama.
2. Kandungannya mempunyai kaitan dengan kuasa ghaib
3. Ia diamalkan dengan mempunyai matlamat tertentu.
4. Ia diwarisi daripada perguruan atau melalui cara ghaib seperti menurun atau mimpi.
5. Biasanya memerlukan pengamalnya yakin bersungguh-sungguh, dan sekiranya pengamalnya.
6. berasa kurang keyakinan, ia akan menjadi tawar dan tidak berkesan.

Antara jenis mentera adalah:

1. Mentera pakaian diri
2. Mentera perubatan
3. Mentera pendinding
4. Mentera upacara tertentu
5. Mentera pembinasa bagi melakukan sesuatu perkara terhadap musuh.

Mentera dalam kepercayaan Melayu telah mengalami perubahan daripada kepercayaan anisma, kepada kepercayaan Hindu dan kemudiannya kepada kepercayaan Islam. Oleh itu tidak menghairankan bahawa terdapat istilah-istilah

⁴ Ibid, , 5 Februari 2014.

Islam yang digunakan dalam mentera yang menggantikan istilah Hindu pada awalnya. Salah satu contohnya adalah mentera pengasih seperti di bawah.

Bismi'Ilahi 'L-Rahmani'L-Rahim

Tepuk bantal panggil semangat

Semangat datang dalam mimpi

Aku tak menepuk bantal

Aku menepuk jasad dan roh (si anu)

Satu badan dua nyawa

Satu jasad dua nyawa

Rindu kasih sayang kasih

*Goncangkan jasad dan roh*⁵

TOPIK 4: AMALAN PENGUBATAN MENURUT ISLAM

4.1: CIRI-CIRI PENGAMAL PERUBATAN ISLAM

Seorang pengamal Pengubatan Islam perlulah mempunyai ciri-ciri berikut:

1. Beragama Islam, aqil dan baligh, serta memahami dan mengetahui ilmu asas Islam merangkumi aspek aqidah, syariat dan akhlak, dan sentiasa bertaqwa.
2. Jelas bacaannya serta memahami dan mengetahui apa yang diucapkannya.
3. Tidak melakukan perkara-perkara yang boleh membawa kepada syirik.
4. Tidak melakukan maksiat, jenayah dan apa sahaja yang bertentangan dengan undang-undang Negara.
5. Ikhlas, iaitu mengerjakan sesuatu semata-mata kerana Allah SWT, bukan kerana untuk menunjuk-nunjuk, mendapat ganjaran kebendaan dan sebagainya.
6. Ketahanan jiwa dan rohani, iaitu mempunyai kepercayaan penuh dan melakukan amalan-amalan tertentu mengikut kehendak dan tuntutan Rukun Iman.

⁵ <http://alam-melayu.blogspot.com/2007/06/definasi-mentera-jampi-serapah.html>, 5 Februari 2014.

7. Benteng pertahanan diri, iaitu amalan-amalan yang berupa bacaanbacaan dan doa untuk memperkuat ketahanan diri, mental dan fizikal.
8. Setiap pengalaman dan pengubatan yang dilakukan perlulah merujuk kepada kitab Al-Quran, Hadis, Ijmak dan Qias, iaitu pegangan Ahli Sunnah Wal Jamaah.
9. Pembayaran di atas perkhidmatan boleh diambil mengikut kos pengubatan, tetapi tidak membebankan pesakit.
10. Tidak mengambil kesempatan ke atas pesakit.⁶

4.2: KAEDAH RAWATAN PENGUBATAN ISLAM

Rawatan pengubatan Islam perlu berdasarkan kaedah-kaedah seperti berikut:

1. Penggunaan ayat-ayat Al-Quran, selawat, zikir dan doa-doa untuk jenis-jenis penyakit hendaklah berlandaskan al-Quran, as-Sunnah, amalan salaf al-soleh atau ulamak muktabar serta doa-doa dalam bahasa yang difahami maksudnya.
2. Pengamal perlulah memberi kekuatan psikologi/fikiran/mental serta semangat kepada pesakit dengan menunjukkan rasa simpati, kesungguhan dan keikhlasan ketika memberi rawatan serta layanan yang sama rata antara pesakit-pesakit yang dirawat.
3. Selain daripada doa-doa yang dibaca oleh pengamal, pesakit juga perlu mengamalkan ayat-ayat Al-Quran dan doa-doa tertentu, serta beribadat dalam usahanya untuk mengubati diri sendiri.
4. Kaedah rawatan yang dibenarkan adalah seperti minum, sapu, mandi, renjis, tepuk, kebas, hembus atau kaedah lain yang tidak memudharatkan dan tidak menzalimi.
5. Kaedah yang tidak dibenarkan adalah seperti bedah batin, perbuatan yang memudharatkan atau menzalimi pesakit atau mana-mana kaedah yang bercanggah dengan hokum syarak.

⁶ Haron Din, 2005, Konsep Perubatan Islam, Selangor Darul Ehsan, Persatuan Kebajikan dan Pengubatan Islam Malaysia & Koperasi Darussyifa' Berhad. Hlm 6.

6. Peralatan atau bahan yang dibenarkan adalah seperti air, herba seperti limau, daun-daun, habbatussauda', minyak zaitun, madu, bekam, garam atau bahan yang suci dan halal menurut syarak.
7. Peralatan atau bahan yang tidak dibenarkan untuk digunakan adalah seperti peralatan tajam, seperti keris atau peralatan yang memudharatkan seperti besi panas dan sebagainya.
8. Bagi rawatan khusus termasuk rawatan histeria, rawatan santau, mengeluarkan atau mematikan susuk dan rawatan resdung yang memerlukan ruang khas semasa sesi rawatan terutama yang melibatkan batasan aurat pesakit perlu mengambil perhatian terhadap perkara-perkara seperti mana di jadual 1 berkaitan Indikasi, kontraindikasi, serta langkah berjaga-jaga bagi rawatan khusus.
9. Rawatan bekam perlulah dijalankan di dalam bilik khas atau tempat yang sesuai. Prosedur perlu dilakukan dalam keadaan steril. Pengamal perlulah menggunakan peralatan yang telah disucihama mengikut piawaian yang ditetapkan dan setiap pengamal perlu memastikan sisa klinikal dibuang mengikut piawaian yang ditetapkan.⁷

4.3: LARANGAN-LARANGAN DALAM PENGUBATAN ISLAM

Perawat Pengubatan Islam adalah ditegah sama sekali daripada mengamalkan penggunaan bahan-bahan dan amalan-amalan yang bercanggah dengan hukum-hukum Islam serta boleh membawa kepada syirik dan fitnah (termasuklah penggunaan terma-terma yang boleh mengelirukan masyarakat umum). Berikut adalah perkara-perkara yang dilarang sebagai perawat :

- Sumber Ambilan dan Bacaan:
 1. Menyalahgunakan ayat Al-Quran dalam perawatan, seperti menambah, mengurang atau menterbalikkan susunan ayat Al-Qur'an.
 2. Menggunakan kitab Al-Quran dengan cara yang tidak wajar, seperti menggantung Al-Quran dan menunggunya berpusing atau tidak untuk dijadikan alasan tertentu bagi sesuatu (*istihza'*).

⁷ Haron Din, 2005, Konsep Perubatan Islam, Selangor Darul Ehsan, Persatuan Kebajikan dan Pengubatan Islam Malaysia & Koperasi Darussyifa' Berhad. Hlm 7.

3. Menggunakan lafaz-lafaz, perkataan atau tulisan yang kurang jelas ertinya, lucuk atau tidak sah disebutannya.
4. Menggunakan azimat, tangkal atau susuk, samada daripada ayat Al-Quran atau bahan lain.
5. Penggunaan wafak, kerana tanpa akidah yang sempurna, boleh menjerumuskan pengguna kepada syirik.
6. Mendakwa mendapat ilmu daripada mimpi, ilham, bisikan-bisikandan kitab-kitab yang tidak sah sumbernya.

- Perawat:

1. Mendakwa dirinya kasyaf, dapat mengetahui dan melihat perkara-perkara ghaib.
2. Pengijazahan hanya melalui cakera padat, buku, internet, atau apa sahaja cara tanpa berguru.

- Cara Merawat dan Kaedah Rawatan yang Digunakan:

1. Sebarang kaedah rawatan yang meragukan seperti melakukan rawatan di dalam bilik yang gelap.
2. Menjalankan pembedahan batin yang dilakukan secara ghaib yang batil dan/atau dengan bantuan makhluk halus atau secara makrifat.
3. Menggunakan perantara seperti asap kemenyan, tembakau, colok dan sebagainya, serta mengamalkan perbuatan ‘menurun’ atau menyemah.
4. Mendakwa dapat menentukan jumlah jin atau makhluk halus yang mengganggu dan menangkap serta membuang atau memindahkan jin atau makhluk halus tersebut.
5. Perbuatan atau kaedah yang mendatangkan keraguan atau bersifat menghina agama Islam.
6. Menggunakan ilmu hitam atau sihir sebagai media perawatan.
7. Meminta pertolongan makhluk halus dalam rawatan.
8. Perbuatan merawat premis dengan menggunakan perkaraperkara dan kaedah-kaedah yang dilarang Islam.

- Bahan-bahan Rawatan:

1. Penggunaan bahan-bahan yang najis seperti khinzir, anjing, darah, bangkai, arak dan sebagainya.
2. Bahan yang dikaitkan dengan sihir seperti minyak dagu, minyak pengasih, minyak senyonyong, minyak cenuai, nasi tangas dan sebagainya.
3. Bahan yang dikaitkan dengan pemujaan seperti kain kapan, tanah kubur, senjata lama, tulang-belulang, rambut dan sebagainya.⁸

TOPIK 5: HUKUM-HUKUM BERKAITAN MANTERA, JAMPI & SERAPAH

Hukum Menjampi Sambil Meletakkan Tapak Tangan di Tempat Sakit

Sheikh Abdullah al-Jabrain pernah ditanya persoalan tentang meletakkan tapak tangan di tempat yang sakit, seperti pada kepala, anggota badan, dan tempat-tempat lain sambil membacakan jampi yang dibenarkan oleh syarak.

Dalam fatwa yang dikeluarkan, beliau menyatakan bahawa tidak menjadi masalah untuk membacakan jampi (ruqyah) yang dibenarkan oleh syarak kerana sesungguhnya al-Quran itu menjadi penawar dan penyembuh kepada orang yang beriman. Begitu juga, tidak menjadi masalah dan dibolehkan untuk meletakkan tapak tangan pada tempat yang sakit (merujuk kepada perawat meletakkan tapak tangannya di tempat yang sakit pada badan pesakit) dan menyapu tempat sakit itu setelah meniupkan jampi-jampi yang dibacakan. Bahkan harus hukumnya membaca ruqyah diikuti dengan tiupan pada seluruh tubuh badan atau tempat yang sakit berdasarkan beberapa amalan Rasulullah SAW.⁹

Sabda Rasulullah SAW yang diriwayatkan oleh Aisyah RA yang bermaksud: *“Nabi SAW telah menziarahi salah seorang ahli keluarganya yang sedang sakit, maka baginda mengusap-usap pesakit itu dengan tangan kanan baginda sambil*

⁸ Haron Din, 2005, Konsep Perubatan Islam, Selangor Darul Ehsan, Persatuan Kebajikan dan Pengubatan Islam Malaysia & Koperasi Darussyifa' Berhad. Hlm 8.

⁹ Haron Din, 2012, Pengantar Perubatan Islam, Jld. 1, Selangor Darul Ehsan, Persatuan Kebajikan dan Pengubatan Islam Malaysia & Koperasi Darussyifa' Berhad. Hlm 108.

membaca doa berikut: “Ya Allah, tuhan dari semua manusia, hilangkanlah segala sakit, sembuhkanlah, hanya engkau dapat menyembuhkan, tiada kesembuhan kecuali kesembuhanMU, kesembuhan yang tidak dihinggapinya penyakit lagi.”

Hukum Menjampi Beramai-Ramai Menggunakan Mikrofon

Dalam situasi semasa kini, ramai pesakit yang datang berjumpa pengamal perubatan Islam untuk mendapatkan rawatan. Kadangkala jumlah yang hadir untuk rawatan tersebut terlalu ramai dan memerlukan waktu yang lama untuk dirawat. Sheikh Abdullah al-Jabrain pernah dikemukakan pertanyaan berkaitan menjalankan rawatan dengan menggunakan jampi-jampi yang sah dan dibenarkan syarak terhadap suatu kumpulan pesakit yang dikumpulkan pada suatu tempat seperti dewan dan sebagainya. Lalu dengan menggunakan mikrofon, jampi-jampi tersebut dibacakan untuk semua pesakit tersebut.¹⁰

Dalam jawapan yang dikemukakan oleh Sheikh Abdullah al-Jabrain, beliau menyatakan, pernah disebutkan bahawa sebahagian perawat ada yang berbuat demikian ketika merawat dan ia memberi faedah dan kesan terhadap kesembuhan bagi kebanyakan pesakit yang dirawat dengan cara demikian. Ini kerana dengan melakukan demikian, walaupun menggunakan perantaraan mikrofon untuk menjampi, bacaan ayat-ayat al-Quran, doa-doa dan wairid-wirid tertentu, ia dapat didengar oleh orang yang terkena rasukan jin dan syaitan. Kita faham bahawa jin dan syaitan tidak sukan mendengar al-Quran. Kesannya menyebabkan pesakit meraung dan menjerit kesakitan apabila dijampi sedemikian walaupun tidak dihembuskan kepada pesakit itu. Ia jelas bahawa al-Quran adalah penyembuh segala penyakit sepetimana telah disebutkan di dalam al-Quran sendiri.

Akan tetapi dalam perkara ini, membaca jampi yang sah, ditiupkan dan disapukan kepada setiap pesakit adalah lebih berkesan dan lebih baik berbanding dilakukan beramai-ramai. Oleh itu difahami bahawa dalam rawatan terhadap pesakit, bacaan jampi yang sah, dihembuskan dan disapukan kepada mana-mana anggota

¹⁰ Ibid, Hlm 115.

yang sakit di tubuh badan setiap pesakit adalah lebih baik jika dibandingkan dengan melakukan pesakit yang ramai walaupun ia juga memberi kesan kesembuhan.¹¹

Hukum Menjampi Menggunakan Selain Daripada Ayat al-Quran dan al-Hadith

Di kalangan pengamal perubatan Islam, mereka terdiri daripada pelbagai lapisan masyarakat dan latar belakang budaya. Dalam menjalankan rawatan, sebahagian daripada mereka tidak menggunakan jampi-jampi daripada ayat al-Quran dan hadith Rasulullah SAW. Sebaliknya mereka tidak menggunakan jampi dan mantera yang diambil daripada ahli-ahli yang soleh, orang yang telah berumur (berpengalaman luas) dan alim ulama tertentu. Jampi-jampi tersebut ada kalanya menggunakan lafaz-lafaz yang umum dan sebahagiannya menggunakan bahasa lain atau menggunakan bahasa ‘Arab ‘Ammi (bahasa pasar).¹²

Persoalan ini telah dikemukakan kepada Sheikh Abdullah al-Jabrain, lalu beliau menjawabnya dengan menyatakan bahawa dalam persoalan ini, tidak menjadi larangan untuk menjampi menggunakan jampi selain daripada jampi-jampi yang diambil daripada al-Quran dan hadith Rasulullah SAW serta doa-doa yang ma'thur iaitu dengan syarat bacaan dan lafaz-lafaz dalam jampi dan mantera tersebut boleh difahami maknanya dan tidak ada lafaz atau unsur-unsur syirik kepada Allah. Bahkan hendaklah diyakini bahawa bukan jampi tersebut yang memberikan kesan kesembuhan terhadap penyakit itu, melainkan kesembuhan itu adalah daripada Allah SWT semata-mata.¹³

Hukum Bagi Orang Yang Tidak Berpengatahuan Ilmu Agama Menjampi Dengan Ayat-ayat al-Quran

11 Haron Din, 2012, Pengantar Perubatan Islam, Jld. 1, Selangor Darul Ehsan, Persatuan Kebajikan dan Pengubatan Islam Malaysia & Koperasi Darussyifa' Berhad. Hlm 116.

12 Ibid. Hlm. 118.

13 Haron Din, 2012, Pengantar Perubatan Islam, Jld. 1, Selangor Darul Ehsan, Persatuan Kebajikan dan Pengubatan Islam Malaysia & Koperasi Darussyifa' Berhad. Hlm 118.

Dalam suatu pertanyaan yang dikemukakan kepada Sheikh Abdullah al-Jabrain mengenai peribadi seorang perawat yang menggunakan ayat-ayat al-Quran sebagai jampi (ruqyah). Ini kerana ada pendapat yang mengatakan bahawa seseorang itu tidak harus untuk membacakan jampi-jampi daripada ayat-ayat al-Quran melainkan dia adalah seorang yang berpengetahuan luas dalam agama. Dalam pada itu, terdapat segolongan yang lain pula mendakwa bahawa adalah memadai orang yang menjampi menggunakan ayat-ayat al-Quran tersebut di kalangan orang yang hafaz al-Quran. Mempunyai aqidah yang benar dan merupakan seorang yang baik dan bertaqwa.¹⁴

Kekeliruan tersebut telah dijawab oleh Sheikh Abdullah dengan menyatakan bahawa dalam perkara ini, hukum sebenarnya adalah harus untuk membacakan ruqyah bagi seseorang yang mampu membaca al-Quran dengan baik, memahami terjemahannya, mempunyai aqidah yang murni, amal ibadah yang betul dan berakhlak dengan akhlak yang mulia. Tidak disyaratkan mengetahui semua ilmu beserta cabang-cabangnya dan buktinya kisah Abu Sa'id al-Kudri mengenai orang yang membaca ruqyah kepada orang yang disengat dengan katanya: Kami tidak perlu mengetahui yang dia tahu apa-apa mengenai ruqyah (bagi pendapat yang mengatakan bahawa yang menjampi bukan Abu Sa'id tetapi orang lain – rujuk syarah hadith). Seseorang raqi (yang menjampi) mestilah seseorang yang berniat baik untuk menolong orang Islam dan tidak memikirkan ganjaran dan upah agar bacaannya lebih berkesan dalam memberikan manfaat kepada orang lain.¹⁵

Hukum Membaca Jampi Daripada Ayat-ayat al-Quran, Berulang-ulang Dengan Bilangan Yang ditetapkan.

Sheikh Abdullah al-Jabrain juga pernah mengemukakan persoalan tentang menganggap sebahagian daripada jampi yang disyariatkan, terhadap bacaan dan doa-doa yang tidak warid daripada Rasulullah SAW tetapi ia ditujukan hanya kepada Allah SWT tanpa melibatkan unsur-unsur syirik. Begitu juga ditanya tentang hukum orang yang membaca surah-surah dan ayat-ayat tertentu yang tidak disebut secara khusus dalam as-Sunnah namun hanya dianggap sebagai sesuai dan baik oleh individu yang menjampi itu dan dia membacanya secara berulang-ulang dengan

¹⁴ Ibid. Hlm 128.

¹⁵ Ibid. Hlm 129.

bilangan tertentu tanpa beriktihad bahawa bilangan tersebut mempunyai kesan kepada kesembuhan.¹⁶

Dalam jawapan yang dikemukakan oleh Sheikh Abdullah, beliau menyebutkan bahawa jampi-jampi yang syar'i tidak ditetapkan dan dihadkan pada surah, ayat dan doa yang tertentu sahaja bahkan ia bersifat mutlak. Sabda Rasulullah SAW yang diriwayatkan oleh muslim bermaksud: *"Tidak mengapa dengan jampi-jampi selagi tidak berunsur syirik"*.

Selagi sesuatu bacaan itu bebas daripada melibatkan permintaan kepada jin dan syaitan, penyembelihan yang dipersembahkan kepada selain daripada Allah SWT dan sebarang aktiviti yang bersalahan dengan syarak seperti memakan najis dan meninggalkan solat, maka bacaan tersebut hukumnya harus. Allah SWT menyifatkan keseluruhan al-Quran sebagai syifa' dan rahmat bagi orang-orang yang beriman. Allah SWT juga tidak menetapkan ayat-ayat tertentu secara khusus dan begitu juga Allah SWT menyuruh kita berdoa.¹⁷

TOPIK 7: FATWA PENGGUNAAN MANTERA, JAMPI & SERAPAH YANG DISEPAKATI

Sebuah hadis rasulullah jelas menunjukkan keharusan penggunaan jampi selagi mana ia bertujuan kebaikan serta menggunakan bahasa yang difahami dengan tidak mengandungi perkara dan perbuatan syirik kepada Allah. Auf bin Malik berkata:

"kami pernah menggunakan jampi mentera ketika jahiliyyah dahulu lalu kami bertanya: "Wahai rasulullah apakah pendapat kamu tentang perkara ini ?"

¹⁶ Haron Din, 2012, Pengantar Perubatan Islam, Jld. 1, Selangor Darul Ehsan, Persatuan Kebajikan dan Pengubatan Islam Malaysia & Koperasi Darussyifa' Berhad. Hlm 129.

¹⁷ Ibid. Hlm 130.

Baginda menjawab: " Kemukakan padaku mentera kamu itu. Tidak mengapa jampi mentera itu selagi tidak mengandungi syirik".

Setiap masyarakat mempunyai kepercayaan tersendiri termasuk dalam penggunaan jampi. Orang kristian mempercayai penggunaan bible dapat menyembuhkan penyakit yang diakibatkan oleh rasukan jin, demikian juga dengan golongan hindu dan budha yang turut mempunyai jampi tertentu dalam menangani masalah seharian. Masyarakat orang asli, masyarakat eskimo di kutub utara turut mempunyai ritual dan jampi mereka sendiri dalam menghadapi masalah. Kesemua jampi ini dihukumkan harus selagimana ia tidak menyandarkan kesembuhan dan keberkesanan jampi selain Allah disamping penggunaan bahan yang halal, perkataan yang difahami tidak mengandungi ungkapan yang menyekutukan Allah serta tidak juga menggunakan perkataan lucah atau apa-apa nama mahupun sebutan yang tidak difahami maksudnya. Jampi juga boleh digunakan dalam apa-apa bahasa sekiranya bahasa tersebut difahami maksudnya serta tidak bercanggah dengan perkara diatas.¹⁸

Atas dalil daripada hadis diatas, dapat disimpulkan bahawa jampi adalah harus disisi syara' sekiranya ia mempunyai ciri-ciri yang disebutkan diatas sebaliknya adalah haram disisi syara' sekiranya ia menggunakan ungkapan yang berikut:

1. Menyebut perkataan yang tidak difahami maksudnya kerana dibimbangi perkataan yang digunakan merupakan kata-kata penyekutuan kepada Allah.
2. Memuja nama-nama jin dan syaitan mahupun nama-nama sembah berhala.
3. Menggunakan kata-kata lucah dan nista.
4. Menggunakan bahan-bahan yang diharamkan seperti darah dan sebagainya serta sembelihan yang bukan kerana Allah.
5. Menyakini adanya kuasa lain selain Allah dalam menjayakan permintaan.
6. Penggunaa jampi dalam perkara kejahatan.

Beberapa keterangan daripada hadis telah menjelaskan keharusan menjampi dengan bersandarkan kaedah yang dibenarkan syara' malah jampi juga turut boleh

18 [ttp://darussyifaperak.blogspot.com/2009/05/perbezaan-antara-jampi-mentera-serapah.html](http://darussyifaperak.blogspot.com/2009/05/perbezaan-antara-jampi-mentera-serapah.html). 5 Februari 2014.

digunakan dengan menggunakan ayat al-Quran sebagaimana yang dijelaskan melalui kisah Abu Hurairah yang pernah menjampi ketua kampung yang disengat binatang berbisa dengan menggunakan al fatihah. Setelah dirujuk kepada rasulullah, baginda membenarkan tindakan Abu Hurairah dan meminta sebahagian daripada upah yang diberikan. Keharusan jampi ini juga dapat dilihat pada sebuah hadis dimana Abdullah b. Masud ia berkata ketika rasulullah S.A.W sedang bersolat, ketika sujud jari baginda telah disengat oleh seekor kala jengking. Lalu rasulullah SAW berkata: *“Allah melaknat kala ini, juga dilaknat oleh nabi dan tidak pada yang lain.”* Kemudian baginda berdoa pada sebuah mangkuk yang berisi air dan garam. Baginda meletakkan tempat yang kena sengat dalam air garam dan membacakan Qul huwa' Llahu ahad dan al-mu' awwizatain sehingga sembuh.

KESIMPULAN

Ulama' sepakat menyatakan keharusan menjampi terutamanya dengan menggunakan ayat-ayat al-Quran. Ulama' meletakkan taraf jampi seperti berikut:

1. Menjampi dengan menggunakan ayat al-Quran dan doa para nabi yang terdapat di dalam al-Quran. Inilah yang terbaik.
2. Menjampi dengan menggunakan jampi dan doa yang bersumber daripada hadis nabi SAW.

3. Menjampi dengan menggunakan jampi atau doa-doa yang diamalkan oleh salafussoleh.
4. Menyakini hanya Allah sahajalah yang memberi bekas atas setiap perbuatan.
5. Menjampi dengan menggunakan jampi yang difahami maksudnya dimana ianya mestilah menepati syarat berikut:
 - Jampi yang digunakan hendaklah tidak menyekutukan Allah.
 - Jampi yang digunakan tidak memuja nama-nama jin dan syaitan atau apa sahaja nama-nama kerana dibimbangi ianya nama-nama berhala.
 - Jampi yang digunakan tidak menggunakan sebutan yang langsung tidak difahami manusia.
 - Jampi yang digunakan tidak mengandungi kata-kata lucah, nista serta pembohongan.

RUJUKAN

Kamaruzzaman Wan Su, 2011, *Kronologi Sistem Perubatan Islam*, Universiti Islam Antarabangsa Malaysia, Pahang.

Jabatan Mufti Negeri Melaka, 2012, *Garis Panduan Amalan Pengubatan dan Perbomohan Menurut Islam*, Melaka, Jabatan Mufti Negeri Melaka.

Haron Din, 2012, *Pengantar Perubatan Islam*, Jld. 1, Selangor Darul Ehsan, Persatuan Kebajikan dan Pengubatan Islam Malaysia & Koperasi Darussyifa' Berhad.

Haron Din, 2005, Konsep Perubatan Islam, Selangor Darul Ehsan, Persatuan Kebajikan dan Pengubatan Islam Malaysia & Koperasi Darussyifa' Berhad.

Amran Kasimin, 1990, Rawatan Pesakit Menurut al-Quran dan as-Sunnah, Kuala Lumpur, Percetakan Watan Sdn. Bhd.

Danial Zainal Abidin, 2003, Perubatan Islam dan Bukti Sains Moden, Kuala Lumpur, PTS Publication SDN BHD.

<http://www.e-fatwa.gov.my/kategori-fatwa/akidah?page=4>

<http://darussyifaperak.blogspot.com/2009/05/perbezaan-antara-jampi-mentera-serapah.html>

<http://alam-melayu.blogspot.com/2007/06/definasi-mentera-jampi-serapah.html>